



Bitter Dint zu mach,
 Nym in loff Ballus,
 in loff Vitriol,
 in loff Künmin,
 in Nöffel bitterlich,
 in Nöffel reinlich.
 Zerpulver die gall äyffel zu,
 dem zum drey od vier stück,
 und thier es alles zusamen,
 in einen neuen weglase,
 ten topff, so faste gutte Dint.

Doctor Martin Luther ist geboren zu
 Eisleben in der Grafschaft Mansfeld
 Anno 1483. In 10. Novemb. Auf alda
 gestorben. No. 1546. In 18. Februarij.



62 A 23 72

Triam
 ist n
 unlat
 ra in v
 otur n
 i fe. 300
 140. 3
 f. Am
 unti
 d ma
 lat g
 idu
 unnt
 ndu
 vatan
 mdit
 tam
 dñe co
Am
 nere
 ere p
 tam
 cut
 dant
 actica
 oplam
 1. effi
 mist
 lqua

Apologia: das ist: ein
vertedigis rede Geor=
gij Wicelij widder
seine affterreder die Lu=
teristen/ mit sampt kurtzer abcon=
terfeyung Luterischer secten /
vnd preis alter Römischen
Kirchen/nützlich zu
lesen.

Witzel

Auch wie er von der Kirchen ynn die secten ko=
men/vnd von den selbigen widderumb zu der
Kirchen geflohen ist.

Act. xxiiij.
Sie künden mir nicht bey bringen/
des sie mich verklagen.

Zum Christlichen Leser.



Es ist mir not / freuntlicher lieber Leser / das ich diese gegenrede öffentliche thue / die weil die neydischen Luteristen (fürwar ein elend volck) nicht auff hören mit dem scharffen schwert yrer zungen ynn predigten / ynn yren concilien / ynn schloßern / ynn radheusern / vber disch vnd ynn gesprechen mir meinen Christlichen glauben zu schwertzen / meinen namen zu schmehen / vnd meinen ley mud feindlicher weis zubeflecken / allein darumb / das ich ynen den ruck gewandt habe. Vnd habens do hyn gearbeit / das ich (wie wol vnwürdig) ydermans spectakel vnd fabel worden bin / auch ein schewe vnd schrecken meinen bekanten / darzu allenthalb vnd alle zeit vn sicher. Noch hette ich ditz alles mit stillschweigen verdewet / wo sie meinem glauben nicht zu nahe gegraset hetten. Einen Samaritan las ich mich mit dem Herren schelten / aber nicht einen Demoniacum. So gepent Sanct Petrus / man sol Apologias vnsers glaubens thun / Welchs S. Paulus für Agrippa frey gehalten. Vnd ist solchs den alten yñ starckem brauch gewesen / wie am Athanasio / Ruffino vnd Bernardo scheinet. Ich habe dir / lieber Leser / auch hymit dienen wöllen / vnd nicht mir allein / wie du ym furtgang sehen wirst / vnd mein sach also handeln wöllen / das die so noch Luterisch sein weich werden / vñ die so vn lutherisch sein / gesterckt werden sollen / damit es on gemeinen nutz nicht abgienge. Der Herr füre vnd leite vns auff seinem wege / Amen.
Datum Jacobi. An. M. D. XXXij.



Nach dem es hynfurt vn-
leuckbar vnd onbeling bey yderman
ist / wie ich der Lutherische part vr-
laub geben / vnd mich widderumb zur
Kirchen gewandt habe / geschichts /
das sich viel diser meiner that nicht
allein verwunderen / sonder sehr darüber zürnen / Di-
sem ist bisher von mir durch lateinische brieff vielfel-
tig gnug than / darvon yro etliche auch / Gott lob / zu
wancken begynnen. Weil es aber durch des bösen an-
regen viel darbey nicht bleiben lassen / sondern faren
zu / vnd damit sie yren grym büßen / tragen mich mit
gifftigen zungen vnters gemeyn volck / zympt sichs /
das ich mein gerücht / vnd vnschult aus dem stincken-
de offene grabe yres schlundes rette / auff das sie
schamrot vnd der vnuerschampten lügen vberwun-
den fur aller angesicht bestehen.

Erstlich / ist hie nicht gar not ursach zugeben /
warumb ich vom Luter abgewichen / syntmals ditz
yderman bey ym selbs wol abnemen kan. Doch wil
ich etliche umb der guthertzige willen zufals anzey-
gen. Ich habe warhafftiglich befunden / das diser
handel nicht die gemeyn vberallreichende Kyrche
Gottes sey / so wir gleuben vnd nennen Catholica /
sonder sey ein Schisma / das ist / ein Spalt aus der sel-
bigen / newlich erstanden / wie der gleich etliche hun-
dert synt Christi gepurt erstanden sind.

Zum andern / habe ich gantzlich vermerckt den ni-
dergang diser sachen / wie denn alle Schismata bis-
her yre zeit gestanden / vnd bald verschwunden sind /
wie der rauch vñ staub. Dargegen die kirche Gottes /
A ij so wir

so wir glauben vnd nennen Catholica / alweg gesiegt vnd triumphiret hat / also das sie noch stehet wider die helle pforten.

Zum dritten / habe ich gesehen / wer dises handels autor / furgenger vñ meister sey / nemlich ein münch / vnd habe allerding erkant / das / wie der selbig münch dise seine sache allein auff bracht hat / also erhelte / furdert / vnd treybet er sie auch allein / vnd das nach seinem hirn / Macht vnd zurbricht / keret vnd verkeret / sagt vnd leucktet / setzet auff vnd abe alles allein nach seinem lust vnd gefallen / wie er es der sachen gelegenheit am dienstlichsten vnd der Kirchen am widdersten vrtheilet. Wil itzt nicht melden / was yn zu diser sachen bewegt / Auch nicht was er hyryn sucht. Mag auch nicht rügen / was dises Sectenmeisters eigener / wütender / stürmischer / vnbestendiger / stoltzer kopff / blutdürstiges hertz vnd verderblichs furnemen sey. Sein heyligs leben vnd Euangelisch wesen ist gantz deutschem lande bekant / das auch die kindlin darvon sagen. Es hat ein Mönch das Türckenthumb erwackt. Man sehe zu / wo ditz die leng hinaus geradte. Man höret bereit den Türckischen Keyser lieber nennen / denn den Römischen Keyser.

Zum vierden / habe ich bedacht / die blutigen primitias / vnd die vngeschickten / freyen / fleyschlichen / bübischen / leichtfertigen anfenge diser sachen / welche starcke anzeigung sind / aus was brun sie fliesse. Furwar bruder / also fieng sich die kirche Gottes vorzeiten nicht an / Wie wol ym anfang diser sachen zuzeiten etwas gehört vñ gesehen ward / das manchem fromhertzige gefiele / als das da reichet zur reingung der kirchē / aber es wandelt sich bald dahin / das man mercket / was fur ein hund darunter begraben lige.

Zum

Zum funfften/habe ich gespüret / das diser part
gubernirer yro datum haben auff den gemeinen man
gesetzt. Denn wie wol herr omnes der angenomen
part etlicher mas feind wirt von wegen des geitzes vñ
wollebens yrer prediger zc. noch helt. er ehe darbey/
denn beym Pabst. Denn sie ia also freyer vnd wilder/
oder (wie sie es selbst nennen) eygenwillischer leben
mögen/denn sonst. Sonderlich aber stehet diser part
prediger hoffnung auff yrer Fürsten schwert / fallen
dise (das sicher zu gleuben ist) so soltu wunder sehen/
wie es fallens vnd leuckens gelten wirt.

Zum sechsten/habe ich ynn ein bedencck genomen/
den vneuangelischen process diser part / darynn alles
stracks wider das so vnmeslich hoch gerhümet E-
uangelion gethan wirt / vñ vnter des Euangelij man-
tel alle sünde vnd schande ym schwang gehen / wie sie
auch selbs klagen. Schmeck die frucht / so wirstu des
baums ynne werden / do ist wenig guts / Jderman
sucht das sein / von den grösten Fürsten an / bis auff
den geringsten bawr. Nymstu nicht / so hastu nicht.
Der prediger vñ yrer weiber leben vnd werck / ist hel-
ler am tage / den das mir not darvon zu schreiben sey /
Ein blinder sehe wol / worauff es gespiet wirt.
Helff Gott / die kindheit diser secten ist so mechtig vn-
rein / was wolt werden / wenn sie alt würde? Sie ist
ynn zehen iaren so bawfellig worden / was wolt ge-
schehen yn. 1500. iaren? Stehet es lang also / so werden
wir vollend heyden werden / vnd heylige Göttliche
ding werden mit der zeit gar ynn ein vnacht komen.
Es wirt allemeylich alle furcht / zucht / vnd redligkeit
auffgehoben / vnd endlich dahin komen / das wir sa-
gen werden / **D** wer vor oder nach diser Secten gepo-
ren were.

ren were. Ich wil itzt nicht sagen/wie Gott disen zehnerigen abfall geroche hat mit Türckischem sieg/
mit baurschlachten/mit vnerhortem hunger vnd aller ding erschreckliche thewring / mit vnerfarner
schweistranckheit/mit viehsterben/mit brand / mit vbertrefflichen pestilentzen / mit mörderlichen kriegen
durch viel lande / mit grosser vneynigkeit der herren vnd stede/also/das gemeyner landfried ynn grösser
fahr nie gehangen hat / vnd ist kein Somer vergangen/darynn man sich nicht krieg oder auffrur besorget
hette/Weiter/mit mercklicher vntrew / falscheit/bosheit der menschen/das eins schier das ander frisset
/ mit vntreglicher stettiger schatzung &c. O der frucht/o der zeit.

Zum sibenden/hab ich teglich gesehen/wie durch vrsach diser part/die liebe fast ynn aller hertzen erkalt
ist/alle andacht verloschen ist/der gotsdienst fast zur rütelt/gestürtzt vnd zu nicht gemacht ist/das gebete
verkleinet ist/das fasten verspott ist/das almosgebē/bus vnd heyligkeit/keuscheit verlacht ist/vnd alle gute
werck yre wirde verloren haben/das erbermlich zu sagen ist. Vnd sind an der Tugend stad/eitel laster gewaltiglich
eingerissen / also auch / das bey etlichen sund fur keine sund mehr geschetzt wirt / vnd schand
ist nie grösser ehre gewesen. O des volcks/das vns ditz Euangelion geperet hat.

Zum achten habe ich gesehen/wie durch dise Newerung auch die Polliceyen grosse anstos leiden/also/das alle Commun nu hynfurt vnwendiger sind/
vnd schwerlicher regiret werden mögē/wie alle oberkeit klagt. Auch dardurch die schulen fast vntergangen
vnd verderbt sind/zu grossen schaden beyde der
Christenheit

Christenheit vnd Policey. Ich sage auch von den hohen schulen/welche auch wüß ligen/so weit dise seuche vmb sich gefressen hat / Wil schweigen/wie gar on das kein kinder zucht ist/wie wol sie itzt mit yrem Catechismo sich widder zuslicken.

Zum neunenden/habe ich gedacht/das es ia nicht von rechten dingen seyn müsse/weil dise part alles fallen lest/was sich zum guten zeucht/vnd widderumb alles fest hellt was sich zum bösen streckt. Die vierzigtegige fasten ligt darnider/aber die fastnacht steht. Keiner heyligen abent achtet man / aber man feyret doch zur fresserey. Die quateremper sind vergessen/aber S. Martinus/Burckhards/drey Königen/Joannis ꝛc.prasserey ist nicht vergessen. Niemand wil auch mehr hören / wenn man anderst redt/denn sie thun/sprechend / Es sey wider das Euangelium.

Zum zehenden/hab ich gesehen/wie ein Sect ymmer die andere gepere/welchs die rechte farb Luterischer sect ist. Denn dise heuptsect hat bereit sechs oder siben bracht/was wil denn noch werden? Man höret/das teglich mehr newer Propheten auff komen/welche alle yren vrsprung aus Lutero zihen/aus des brüsten sie erst alle gesogen haben. Wo wil denn zu letzt der arm eynfeltig man bleiben? Welchem sol er zu oder abfallen/weil sie alle Gottes wort rhümen? Ach der klage so man stets höret vnterm gemeynen volck/do schier niemand weis/wie oder was er glauben oder thun sol/D yrrung vber alle yrrung/Wehe vnsern seelen/wo es also hangend bleibet.

Zum eylfften / habe ich gesehen vnd noch / wie thurstiglich / wie vnynniglich / wie vbermütiglich
dise

dise part alle heylige lerer / beide new vnd alt / beide lebendige vnd todten verwirfft vnd mit füßen trit. Dar zu alle Concilia vnd alle gute heylsame besserliche decret vnd ordnung der altē Kirchen / Ich las yderman vrteilen / ob sich solch thun mit der waren Kirchen Gottes vertrage / wie sich dise sect denn mit vnuerschampter stirn ausgibt.

Zum zwelfften / hab ich gesehen vnd noch / wie sie die selbige yre sect / mit so vnbestendigem / vngewissem / vngegründtem / menschlichem regiment auffhalten. Da ist keine rechte ordnung / Was do ein iar gilt / das gilt das ander nicht / Dent halten sie es also / morgen anderst / wil nicht sagē / das es keiner helt ynn seiner Kirchen / als der ander / Einem yglichen gefelt seine weise am besten / Itzt richten sie etwas an / das da ausspündig Euangelisch sein sol / bald ligts yñ der aschen / Darnach erdencken sie ein anders / das weret auch einen tantz / darnach wirt sein nymermehr gedacht / vnd so furt an on ende. Sie haben macht alles zusetzen / zu ordnen / zu halten / zu vnterlassen &c. wie sie lustet / wer ist / der sie sol meistern? Sie haben menschen gesetzte vnd ordnung weg genommen / vnd verheischen Gottes gesetzte vnd ordnung an die stat zu bringen / aber wie das gehalten sey / ist fur augen. Vnd solts lang weren / so solten mehr newer menschen gesetzte vnd newer ordnung auff komen / denn vormals ye gewesen. Man sehe doch / was grosser hauffen newer decret der secten Visitatores on vnterlas einfüren vnd gepietē / welche alle vber den leyst gemacht sind / das sie den alten vngleich vnd etwas sonderlichs seyn sollen / den es sonst nicht Euangelisch were / Wie wol sie gezwungen werden / viel alter gewonheit widderumb auffzurichten / auch on yren danck / weil sie nicht
anderst

anderst künden. Das volck merckt solchs / darumb
ists auch so vnwillig auff die sach / gehet vnd mur=
ret / vnd ist vberaus bestürtzet / ia es helt schier auff
nichts / kompt allemeylich ynn ein vnsorge vnd vn=
achtung des gantzen Gotsdienstes / Was sol ich sa=
gen? Sie haben böses mit argem verandert / Weyser
leute constitution mit leichtfertiger leute constitution /
alte löbliche gewonheit mit newer vnbestendiger ge=
wonheit. Es wil ynen an pfaffen gebrechen (welche
sie erst zu leyen gemacht) darumb nemen sie itzt zu der
secten dinst rips raps was da nur lesen kan / es sey ge=
weyhet oder vngeweyhet / Allein das es ein weib ha=
be / oder bald neme / vñ nach einer tod ein andere / vnd
aber ein andere. Denn wie kündt ein weibloser das
from Euangelion predigen? Ich mag itzt nichts spe=
cificiren / Man sehe allein / wie sie es mit dem kasten
spielen / welcher ynn der warheit mehr ein wucher
oder pfaffen kast ist / denn ein Gots oder gemein kast.
Die kirchhöfe sind zu schindgruben worden / vñ wid=
derumb. Etliche dorff kirchen sind zechhenser wor=
den 2c. Ditz auff andere zeit. Der Herr gebe augen /
das alle welt sehe / wie vns ein schwartzkutt angefurt
habe. All ding ist aus seinem gelenck vnd ordnung
gewichen / das es schwerlich widder einzurichten ist.

Zum dreyzehenden / habe ich betracht / wie gar ein
falsche lere dise secte füre / vñ selbigen ein farb mit des
Euangelij titel künstlich angestrichen / vnd mit zierli=
chen süßen Worten gefiddert / domit sie die einfeltigen
hertzen deste ehe zu sich reisse. Wie falsch aber vnd
aussetzig die Luterische lere sey / haben etliche an tag
geben / vnd sol noch / wil Got / klerer dran komen. Ey
des erbermlichen gotslesterlichen verführens. Welcher

B vnter

vnter vns hett ditz vor siben oder acht iarē gegleubt?
Ich sage / wenn schon dise lere / als gerecht bewertet
were / so mecht sie doch yr meyster selbs auff's hōhest
verdechtig. Wo mit? Erstlich / weil er derselbigen kei-
nen Richter leiden wil / auch nicht die Engel / damit
er anzeigen / das er auch kein Concilium leiden kan /
item kein disputation noch verhörung / Wer aber sol-
cher meinung ist / der gibt gnugsam zuuerstehen / was
er im schilde füre. Darnach macht er seine lere schwar-
tze / das er sich allein die heylige schrift auszulegen
vnterstehet / wil keinen meyster dulden / niemand hō-
ren noch achten / denn sich allein / Im ist auch kein le-
re gut genug / wenn sie gleich aus dem schoß Gottes
augenscheynlich siele / so sie nicht nach seinem geist
laut. Was er allein leret / transferirt / disputirt / schrei-
bet / das mus recht seyn / vnd wenns gleich Christus
selbs vnrecht spreche (oder das ich ym nach rede) weñ
gleich die gantze welt dardurch solt zu drymmer ge-
hen / vnangesehen / das er tausetseltig wider sich selbst
leret. Zu letzt / bringt er auch damit seine lere ym aller
menschen argwon / das er so gewaltig auff alle streif-
fet / die sie nicht annemen oder darvon fallen / gerade
als wolt er alle welt zwingen / ym allein zu glauben.
Wo sein hand nicht hin reichet / do reichet sein ver-
terische blutdürstige feddern hyn / damit er einem flux
abhilfft / der sich wider yn setzet. Welchs ob sichs E-
uangelisten zyme / las ich andere sagen. Wer nicht gar
synnlos ist / der mercket wie sich die armen Euangeli-
sten damit selbs verraten / als die so yrer lere (die sie vn-
gewisse vnd sinckend fülen) fur den gelerten fürchten.
Nu gebe ich yderman zu erkennen / ob man dem allein
glauben solle / der sonst niemand glauben wil? Dise
vrsach wil ich obenhyn verzelt haben / welche mich
furnemlich

furnemlich bewegt/vom Euterthum abzukeren. Die
andern wil ich auff andere zeit sparen.

Wie dem nu allem/dennoch sollen sich meine wi-
dersacher schemen / etwas böses von mir zu sagen/
weil ynen yr eigen hertz zeuget / das sie aus neyd vnd
has liegen. Solten sie mich drumb also schmehen/
verfolgen/vnd allerley vbels wider mich reden / das
ich hynfurt yre secten meyde? wöllen sie mich des so
sehr verdenccken? Lieber Gott/mag nicht einer umb-
keren/so er yrrgehet? Mag nicht einer widder auff-
stehen / der do gefallen ist? Mag nicht einer wider
nüchtern werden/der do truncken ist? oder sol er all-
weg yrrgehen/alweg liegen/alweg truncken bleiben?
Gott sey ewig danck/das ichs nicht allein bin/der do
umbkeret. Denn solcher alle lande vol sind/beider der
gelerten vnd yngelerten/welche die sach etwas tieff
betracht/vnd befunden haben/das sie auff sand ste-
het / darumb sie daruon fliehen / als von der rotte
Chore/domit sie nicht mit ynen verderben. Etliche
sind/welche die sach ynn zweinel zusetzen begynnen/
weil sie erkennen / das sichs wol lengert/aber nicht
bessert/ia erkennen/das es synt der zeit nie ist gut ge-
wesen / sonder eitel böse iar vnd böse sitten ynn aller
welt auff's mechtigst regirt haben/als fruchte der ne-
wen lere. Etliche sind bey sich selbs diser sachen halb
yrre/vñ werden doch durch das grosprechtig schrei-
en yrer prediger zu rüch gehalten/wie sie denn stehen/
vnd den armen man mit gelerten Worten bezaubern
künden/setzen yre seele zu pfand / wo es anderst ist/
denn sie leren/hab aber sorgen yre verpfente seele seyen
lang verstanden. Etliche liessen gern abe/thüren aber
nicht aus furcht yrer oberkeit/welche es also haben
B ij wöllen

wöllen/nach dem sie ein mal darauff beredt. Etliche
sind der Luterey schon müde/weil wedder haut noch
har gut dran ist / darzu wedder grund noch boden/
die selbigen halten den wolff bey beyden oren / ynn
dem sie nicht wissen/wo hyn sie sich keren sollen/ deñ
es stehet noch vnrein ynn der Kirchen/ist noch wenig
gefegt/wie sie wol solle zc. Sollen sie denn von einer
secten ynn die andern fallen/so ist's ynen auch nicht zu
thun/vnd wolten doch auch gern auff rechter bane
gen himel wallen/darzu sie aus gnaden beruffen sind.
Ditz habe ich rüren wöllen / auff das meine feinde
wisseten/wie hart man an yrem lappen halte/das sie
nicht yre eigen gutdüncel ewig betriege.

Das sage ich aber/wenn mich yrer einer noch heu-
tigs tags mit beständigem grunde gewis machen
kündt/das yr thun aus Gott vñ recht were/ich wolt
mich weiters bedencen. Aber sie künden oder mögen
oder sollen oder werden es nymmermehr thun. Denn
es kan oder mag oder sol oder wirt kein sect nymmer
mehr die Kirch seyn / vnd wenn sie schon sibem mal
ansehlicher vnd fürmlicher were/denn die Kirche/do
ist dencken nach verloren. Ein sect ist ein sect vñ bleibt
ein sect/wie ein affe ein affe / man schmücket/preyse/
vnd verteydige sie so hoch man wöll. Es waren vor-
zeiten secten / welche so from vnd heylig waren/das
die Luterische dargegen stincken möcht/vnd vnwerd
were/das sie ynen solt die kamerschalen gelangt ha-
ben/dennoch waren es vnd blieben secten/welcher
ende die Kirche die lenge ausharret/wie sie diser aus-
gang auch erwarten/vnd dennoch bleiben wirt/wen
dise wie wachs zerschmoltzen ist.

Auff das aber der Ley gründlich wisse/was das
wörtlin

wörtlin sect bedeut / mus ich ein wenig ym zu gut aus-
spatziren. Als der Christenglaube erst anbrache / vnd
alle welt krefftig durch gieng / das vmbher Kirchen
durchs wort Gottes worden / das ist / das allenthalb
stedte vnd flecken zum glauben tratten / vnd durch die
Taufß vereynigt / gesellet / ein leib vnd seel worden /
yrem Erlöser vnd Herren die tage yres lebens ynn hei-
ligkeit vnd gerechtigkeit für ym von hertzen zu die-
nen / do entgünnet der Satan dem menschen das heyl
Gottes / wart vnmüßig / erdacht fundlin / wie er die
Kirche / das ist / den vereynigten vnd zuhauff gefüg-
ten leib ynn Christi glauben zutrennet vnd zubreche /
Dube erst an / vnd erweckt den Christen einen dun-
ckel / das sie anfiengen einen Lerer dem andern fürzu-
ziehen / Vnd die Petrum höreren / dunckten sich besser
seyn / denn die Paulum höreren / vñ widderumb. Aus
disem kleinen hohmut / erspan sich ymmer mehr vnd
mehr vnwillens vnd zwitterchts vnter den ersten Chri-
sten / das auch Paulus die lenge darwider schreiben
must. j. Corint. j. ij. iij. iij. Denn es wolt nicht allein zur
teylung des Christen volcks reychen / sonder auch zur
verachtung des auffgehenden Euangelij. Es bleybe
nicht darbey / sonder bald drauff fiengen an etliche
Lerer der Christen andere lere fürzugeben / welche
von den Aposteln nie gehört waren / hiengen Jünger
an sich / woltens besser machen denn die Aposteln /
Vnd tratten domit aus gemeinem hauffen des Chri-
sten volcks. Solchs hies man auff Kriechisch Schis-
ma / das ist / ein spalt / ritz oder trennung / als wenn et-
was gantzes aufftrennet oder reisset ꝛc. Welchs wört
lin Sanct Paul braucht wider die eygensinnigkeit der
Corinther / do sie sich auch also trenneten / vnd wolt
einer Petrisch seyn / der ander Paulisch / der dritte
B iij Apollisch /

Apollisch / gleich wie itzt einer Luterisch / der ander
Zwinglisch / yhener Baltasarisch ist. Vnd das alles
vnter dem namen Christi vnd des Euangelij. Die la-
teiner nennens Scissuram / dissidium ꝛc. Augustinus
nennets zu weilen precisionem.

Darnach gab man disen Spaltungen noch einen
namen / vnd hies sie Griechisch hereses / welchs die
lateiner sectas geben / vnd ditz wörtlin brauchet Sanct
Paul auch etliche mal vñ Lucas. Vnd ist eigentlich so
viel auff deutsch / als wenn einer seinen kopff auffse-
tzet / welet ym etwas sonderlichs vber vnd neben dem
so do vor gewesen / feret darnach zu / platzet vnd po-
chet drauff / verdammet alles was er nicht redt oder
thut / lobet das seine allein / zeucht schuler an sich / wie
der Magnet eysen / macht ym ein eigen kirche / eigen
lere / eigen ceremonien / eigen weis vnd werck ꝛc. Sol-
che leut hies man Hereticos / vnd yr wesen ein secten /
darumb das sie sich selbs vmb yrer newen erwelete
weis willen / abgeteilet oder abgehawen hatten von
der ersten vnd grossen Kirchen / als von der / die ynen
nicht gut gnug war ꝛc.

Fast die ersten secten / so da ausbrachen / vnd die
Kirche spalteten / waren der Dymeneer / der Cherine-
ter / der Ebioniter / der Nazareer / der Nicolaiter / Bas-
silidianer / Carpocratianer / Saturnianer / Chilia-
sten / Valentinianer / Cerdonianer / Marcioniter / Cas-
tianer / Encratiter / Appelliter / Montanister / Photi-
nianer / Autemoniter ꝛc. welcher ein igliche ein eigen
meynung furgab / vnd keine mit der andern stimpt /
sonder ein igliche hielt sich selbs fur die einzige Chri-
stenheit / veracht vnd verdampt die andern. Aber ynn
dem

dem waren sie alle eintrechtig / das sie mit gemeynen
hand wider die Kirche fochten / vnd ein ygliche vn-
terstundt sich die selbigen allein zu tilgen / vnd allein
Kirche zu sein / Wie sie es aber ausgefirt haben / sa-
gen vns die Chronigken gnugsam. Leiden hat sie sich
müssen die liebe Kirche / da sie die secten also vnge-
stümlich / eine nach der andere / offft zwo oder drey zu
gleich / angriffen / aber vnterlegen hat sie nie / sonder
alweg ritterlich gesiegt.

Nach disen kamen andere secten / welche sich auch
höchlich an der Kirche versuchten / lieffen sich aber
alle zu tod an yr / als die sect Sabellianer / Valerier /
Samosatener / Manicheer / Dierachiten / Nonatianer
/ Apollinaristen / Arianer / Macedonier / Aetianer
/ Eunomianer / Euticianer &c. Wie viel yro wa-
ren / noch mussten sie die Kirche auch stehen lassen /
vnd mit schanden abziehen.

Darnach ward sie gestürmet von den secten der
Nestorianer / Acephaliter / Euchiter / Seleutianer /
Eluidianer / Antropomorphiter / Monotheliter / Aga-
peter / Sabbatianer / Luciferianer / Jouinianer / Do-
natianer / Pelagianer / Predestinater &c. noch bleybe
sie / wie wol sie viel seele verlore. Denn es an yren vn-
widderbringlichen schaden nie abgangen ist. Wol al-
len / die Gott ynn seiner stadt vnuersehret behüt / vnd
bis an das end bestendig gemacht hat.

Zu letzt / must die Kirche noch mehr angefochten
werden / domit sie gelantert würde / als durch die se-
cten der Camperianer / Dulcinianer / Albigenfer / Al-
banenser / Begginer / Curelupiner / Chaboriter / Dre-
biter /

biter / Felicianer / Merianer / Flagellirer / Colalder /
Valdenser / Picarder / Quiclephiter &c. Wie wol vnter
disen etliche nicht so gar böß ding furgaben / als die
vorigen / vnd die Kirche als durch viel zeit bawfellig
worden / vrsach gabe / zu etlichen secten / yedoch sind
sie drum nicht gerechtfertiget. Denn man vmb et-
lichß mangels willen der Kirchen yre einigkeit nicht
zurreißen soll / wie darvon Ciprianus vnd Augusti-
nus gnugsam geschrieben. Nu zu disen obgenanten
zele die Luterische sect sampt yren döchtern / so wirstu
erkennen / wie die sach stehe. War istß / dise gibt zu
weilen etwas guts fur / vnd wirt widderumb etwas
bößes ynn der Kirchen erfunden / dennoch istß damit
vnbewert / das dise sect die Kirche / vnd die Kirche ein
sect / oder des Teufels nest / wie Luter zu lestern pflegt.
Des sind wir aber gewis / das all das yhenig / so dise
sect guts vnd nutzbarlichß yns volck schütte / das das
selbig nicht yre / sonder der Kirchen sey. Widderumb /
was die Kirche bößes vnd vnnützes hat / treibt oder
leret / das dasselbig nicht der waren Kirchen / sonder
sey von etlichen furwitzigen geitzigen vnd wollusti-
gen menschen mit der zeit darein getragen / also das
man desselbigen on der seelen nachteil wol geraten
künde. Also hastu auffß kurtzest gehört / was do ein
sect heiße vnd sey. Daran habe keinen zweifel.

Weil denn das Luterthum disen obuerzalten se-
cten gleich ist / so künden wir sie warhafftiglich vnd
fur Gott nicht anderst nennen. Denn sie vergleicht
sich mit den vorigen ynn dem sie auch widder die Kir-
che / so wir Catholica gleuben vnd bekennen / on vn-
terlas auffß wütendest streitt / das sie lande vnd stedte
ynne hat / darzu Herren vnd Fürsten / ist offenbar /
das sie

das sie etliche der vorigen auch also gehabt haben.
Das sie gelerte leut hat/haben andere auch gehabt.
Das yr herr omnes leichtlich anhengig wirt/ist vor
auch gewesen/sonderlich wenns also ein frey fleisch
secten war. Das sie die schrift prechtiglich erheben/
ist wol gut/aber das ist nicht gut / das sie yre schrift
darunter verkeuffen / Solchs ist vor auch gewesen/
Denn wo mit wolt man sonst die seele nach sich zie
hen? Das sie etwas lange zeit stehet/weis man/das
die vorigen auch lang vnd viel lenger gestanden ha
ben. Darumb wend es/dreh es wo hyn du wilt/so
wirstu es also finden.

Nu das ich widderumb meinen menschlichen
mordzungen antworte/saget/was mangelt euch an
meiner widderkerung? Wo fur haltet yr euch? Seid
yr Aposteln? Seid yr Euangelisten? Seid yr Pro
pheten? Zwar yr gebet euch darfur aus. Was zen
gen aber ewer werck? Was sagen ewer bucher?
Was vrteylen andere leut von euch? oder sol man es
glenben/weil yrs selbs sagt? Seid yr von Gott ge
sand/warumb leret vnd thut yr denn on vnd wider
das yemig/das die ersten geleret vnd gethan haben?
welche doch auch von Gott gesand waren. Derhalb
mus ia eins feilen / Entwedder die ersten Kirchseule
müssen von Gott nicht gesand seyn/oder yr. Wie nu?
Die ersten haben yre sendung / mit wunderzeichen/
mit vnschuldigem blut / vnd mit heyligem leben be
weyset/Saget/wie habt yr ewere sendung beweiset?
Ir kündt dencken/wie ich alhie dem Esel die lewen
haut abzihen wolte/wenn schelten ablas were/ Also
sage ich/ Ich habe entweder recht oder vnrecht dran
gethan / das ich Luterum verlasse/Das bekennestu.
C Dabe

Dabe ich recht dran gethan / so ist Luter mit seiner gantzen Kotte verloren. Dabe ich aber vnrecht dran gethan / so ist Christus mit seiner gantzen Kirchen (des gelied ich bin) verloren / Denn ich ia mit vnd ynn der Kirchen mich finden lassen sol / die Christus durch seine Apostel vnd nachfolger gegründet vnd gebawet hat. So ist vnwanckelbar / das keine andere Kirch ist / noch seyn kan / denn die so sich bis auff vns durch die succession der Orthodoxen strecket. Darvon hernach mehr.

Ich mus mehr mit euch ottern reden. Unterweyset mich / was sol ich thun? Sol ich bey euch bleiben? Das radtet yr gewislich. Nu stehet doch alhie ewer Schwester pars Zwinglii / vnd spricht / yr yrret grawsamlich / vnd widderredt mir trewlich / ich sol euch nicht folgen / So stehet auff der ander seyten Schwester pars Baltasaris / vnd spricht / Ir verführet land vnd leut / mehr denn kein Antichrist / vnd widerredt mir auch / euch zu folgen. Darzu kompt itzt (sagt man) ewer süster pars Campani ⁊ cuiusdam Dispani / die spricht auch / yr yrret / kündt nichts ynn der schrift ꝛc. So weys ich furwar / wenn Johan Dus noch lebet / er würde euch auch nicht zufallen / wie mich seine schriftte noch ansehen / ausgenommen beyderley gestalt vnd verwerffung des Cleri. Ober dise alle / haltens die Waldenser vnd Picarder auch nicht mit euch / sonder wider euch / welche auch nicht die geringsten Christen seyn wöllen. Alle dise / wie die vorigen secten / sind ynn dem alleyn eins / das sie mit semplicher hand wider die Römische Kirche kriegen.

Wie thu ich ym nu? Eine ygliche sect vnter disen
wincket

wincket mir zu sich / verheyscht mir das leben / sagt
Christus mit dem Euangelio sey allein bey ynen / vnd
sonst nirgend. Trete ich nu zu diser einer / so verdam-
met yr mich ynn abgrundt. Widderumb trete ich zu
euch / so verdammen yhene tieffer denn ynn abgrund.
Ir kündt predigen / yhene auch / Ir kündt die schrifft
auslegen (nach ewerem synn) yhene auch nach yrem
synn / Ir habt volck / das euch als die Engel Gottes
lobt vnd starck bey euch helt / yhene auch / Ir wisset
künste vnd zungen / yhener etliche wissen mehr vnd
bas / Ir seid from (wie fur augen) yhene sind alle frö-
mer vnd senfftmütiger / Ir leidet verfolgung (wenn
euch die hende gebunden sind) yhener etliche leiden
mehr vnd gedultiger / vnd so fort an. Auff das yr er-
kennet / das / wenns vergleychens gulte / würdet yr
oben beym handfas sitzen / wie gros yr euch aus-
brecht.

Weil ich denn nu vnter so viel secten diser zeit stehe /
vnd von yglicher gezuckt vnd gereitzt werde / vnd kei-
ne auch bey sich selbst gewiss ist / schweige / das sie
mich gewiss machen soll / vnd wider einander sind /
das auch eine die andere mit der faust iagt vnd ker-
ckert &c. so kan ich vnd yderman nicht bessers / denn
das wir vns nach vnser ersten Mutter vnd ErbKir-
chen umbsehen / darein keren / vnd mit yr versünen /
vnd lassen sich die Röttische rangen vnter sich selbs
hauen vnd beissen / thuts ynen wehe / sie werden wol
auffhören / Man ist vnd bleibt doch bey vnd vnter
ynen vngewiss vnd gutes gewissens beraubt / Vnd
wer sich einer secten gibt / der ist darnach seiner selbs
nicht mechtig / vnd lesset sich hic ein / dort ein andere
nemen. Darumb ists besser / ein pferch der Kirchen
C ij bleiben /

bleiben/denn do allein ist sicherheit / gewisheit / leben / gut gewissen / vnd ewigs heyl. Der Herr gebe yderman yns hertz / das er disem nachtrachte.

Noch eins. Wolan yr Euteristen / ich sol ewer lere fur Christi lere halten / vnd sonst keine mehr vnter der sonne. Ist nicht also? Tu / so wisset yr wer ewere lere auffbracht hat / nemlich Euter / ein man voller affect. Wie bestünde ich denn nu mit ewerer lere / wenn er / der lere vater vnd fürer / ein mal rads würde / vnd wid derrieffe? wo bleybe ich denn? Es ist sich zu ym alles menschlich zuuersehen / wil nicht sagen / das er auch auff ein zeit geschrieben hat / Man solle fallen lassen / was er vor etlichen iarengeleret habe. Wo sind aber die blichen / so da gestorben sind auff seine vorige lere / ehe er sich solches hören lies? kündigt nicht geschehen / das er solchs hynfurt noch ein mal thett / sonderlich itzt / weil er fület / wie sein sache berg hinab gehe. Gleube mir / wenn es zum eussersten Kompt / das es land vnd leut kosten soll / er wirt sich lindern lassen / wie er denn itzt ein vier iar her than hat / welchs vor niemand von ym geglaubet hett. Sihe / wo bleybe ich denn? Kete das palatium / vnd das hönig leben ist ym so leib / das seinem geist wenig zu trawen ist. Ach der narren / die wir vnser seelen solchen leuten so lang vertrawet haben / die nu allererst gröblich anzeigen / was sie gesucht.

Sprichstu / Was fragen wir nach Eutern / Gottes wort gleuben wir zc. Antwort. Ich habe die strophen mehr gehört / Es findt sich aber weit anderst / Ir gesellen seid nicht so küne / das yr thüret sagen / Das ist Gottes wort / wenn yr nicht wisset / das es
Euter

Luter vorgeschrieben habe / Widderumb thüret yr
auch nicht gauffen / das Luter allenthalb durch vnd
durch Gottes wort lere. Oder liege ich? Gib mir ei-
nen rechten Luterischen / der da Gottes wort vnd Lu-
tern mit ernst scheide? Wenn sie vom gegenteil ge-
drungen werden / so fliehen sie ynn dise lucken / das sie
Luters person verlencken / O der getrewen Jünger /
Ich weis vnd bins gewiss / das die buben so hart an
der Münchskutten hangen / das wenn die selbige
noch feltzainers auff brechte / sie würden yr glauben /
nach dem sie des ein mal vberredt sind / das Luter
Delias sey / vnd künde nicht wol yrrer zc. Ja sie hal-
tens für gottlosigkeit / das sie anderst zischen solten /
denn er / folgen nicht allein seiner eynigen lere / sonder
auch seinen wercken / geberden / Kleydungen / ich hett
schier zu viel geredt. Vnd es solt einer rham fahen / der
mit ym / auch ynn einem sententz mishielte / Noch
thüren sie sagen / Was gehet vns der Luter an / wir
stehen bey Gottes wort. Frag du sie flux wider / Leret
denn Luter nicht Gottes wort? Leret er nicht Gottes
wort / warumb glaubstu ym denn? Leret er aber Got-
tes wort / warumb gehet er dich denn nicht an? Aber
sie haben das schentüchlin abgeleget / reden vnd
schweigen / wie sie lustet / vnd wie der sachen not thut.

Ich mus noch eins mit euch reden / Ir radtet
mir / ich solts mit euch halten. Nu wolan / mit wel-
chem denn vnter euch soll ichs halten / nach dem yr
selbs etwas zuspaltet seid? Inn welches land odder
stadt / so ewers losaments ist / sol ich zihen? Ja ich se-
tze / das ich ynn einer stad bin / do viel Luterischer
pfarrn ynne sind / zu welcher sol ich mi gehen / weil es
fast keine helt / als die andere / Vnd eine ygliche yren

C iij

prediger

prediger für anderen lobet? Denn es nicht zu leuckett
ist / wie offft einer etwas predigt / das dem anderen
nicht gefelt / ia das er offentlich vnd sonderlich wid=
derspricht? Ich wil nicht sagen / wie vngleich sie yre
Kirchenbreuche halten / damit sie das vngelert volck
bestürtzt machen / wie yderman klagt / Allein ynn der
grundsuppen des grewlichen yrsals sind sie alle eyns /
vnd halten drob wie solcher bundgenossen art ist.

Derhalb so greyffet yrs / wolt yrs nicht sehen /
das nicht allein ich / sonder yderman recht vnd weis=
lich dran thut / der ewer vneynige schedliche secten
vbergibt / vnd gedencet widderumb hynder sich / dar=
ab er eynfeltiger meynung / durch ewere glatte wort
gefallen ist.

Ir kündt mirs auch nicht für ein schand auffrü=
cken / eben so wenig das ein schand ist / wenn einer von
seiner torheit klug wirt / oder wenn einer von schalck=
heit abliesse vnd würde from / Fallen ist kein schan=
de / sonder nicht widderauffstehen. Euch ist schan=
de vnd sünde darzu / das yr ynn der vnchristlichen vn=
flettigen secten liget vnd waltzet / schendet vnd schme=
het. Darüber ewer einige Kirche / darinn yr die Tauff
vnd erst bekentnis Gottes empfangen habt / veracht /
verdammnet / teuффelt / ketzert vnd engstet alle so do
nicht mit euch lauffen / haltet euch allein für Chri=
sten / damit yr alle andere auff dem gantzen erdbo=
den / lebendigen vnd todten / zu ewigem fewr verur=
teilt. Für euch ist mirs ein grosse schande / vnd nicht
ein kleine fahr meines lebens / aber sonst bey keynem
fromen / Vnd gleich wie euch ewer vnbusfertigkeit
ein zeitliche schande hie vnd ein ewige schande vnd
pein

pein dort fur Gott/ allen Engeln vnd heyligen ist/ als
so ist mir mein Abkerung ein zeitliche ehre hie bey den
liebhabern Christi/ vnd ein ewige ehre vnd freude
dort fur Gott/ den Engeln/ heyligen vnd allen Crea-
turen.

Ir vermögt mir auch nicht meine widderkerung
fur ein vnbestendigkeit auslegen/ viel weniger fur
leichtfertigkeit/ yr wöllet denn mutwillig liegen/ das
yr sonst nicht pflegt. Denn wer wolt einen Juden vn-
bestendig schelten/ das er sich vom Judenthum zum
Christenthum gebe? Furwar vnbestendig vnd leicht-
fertig war ich gnugsam/ do ich vor zehen iaren von
der Kirchen zur secten siele/ darynn yr noch nistet/ bis
yr ein mal einen Ziska ausbrüten werdet. Aber mein
Jugent hilfft die selbige meine vnbestendigkeit ent-
schuldigen/ Darzu so hatte ich meine tage keinen lerer
der Kirchen nie gesehen/ schweige/ gelesen/ derhalb
ich wol zu verführen war/ vnd macht auch on das der
deutschen sprichwort war/ Wer do gern tantzt/ dem
mag man leichtlich pfeiffen. So yr euch bestendig
haltet/ so ist ein Mahometist auch bestendig zu hal-
ten/ die weil er so fest ynn seinem angenommen glauben
stehet. Des gleichen bestendigkeit hielt der verzweif-
felt Niswick ynn Seeland. Behüt mich Gott fur ke-
tzerischer bestendigkeit/ welche mehr verstockung vnd
halsstarrigkeit zu nennen ist.

Das yr aber sagt/ Ich sey des Euangelij grosser
furfechter gewesen &c. Antwort ich/ Welches Euan-
gelij? Christi oder Luteri? Ich bekenne/ das ich dise
lere an des Euangelij stadt emsiglich getrieben/ vnd
die Kirche dardurch verfolget habe. Aber ich habs
aus

aus vnwissenheit than / Deshalb ist mir deste grösser
erbarmung von Gott widderfaren. Wie nu das ge-
schehen / so zeuget mir mein gewissen noch henttigs
tags / das ich dennoch alweg hette gern recht gethan
für mich / vnd hette es auch gern gut mit Christlicher
Religion gesehen. Mein Gott vnd Herr hat mich
ymmer dohin gezogen / das ich nie zu vnchristlichem
vnredlichem wesen mit ernst gewilligt habe / so fern
ichs verstanden. Derhalb alles was ich ynn diser sa-
chen gearbeit habe / das habe ich meines verstands
(oder müs Gottes andlitz nymmermehr beschawen)
gemeyner Christenheit zum besten gethan / ynn Des-
sen / Düringen vnd Sachsen / mit grossen vleis / was-
che vnd sorge / wie mir alle bekanten zeugen / vnd etli-
che meiner büchlin. Das kan ich auch mit warheit
sagen / das mir Gott zeitlich einen vorgeschmack diser
secten gabe / ynn dem mich meine synne zu vielen din-
gen gar nicht tragen wolten / Wie wol ich die sache
ynn sich sehr liebet / vnd mein freude war / wenn sie
am meysten zuname / Denn auch vor dem Barockrie-
ge wolt mir etlicher thun nicht gefallen / wie noch
ausweyssen etliche meiner handschrift / Es lies sich
fehrlich an / noch gefiele mir die sache ynn sich / der-
halb ich sie keck verfachte / nicht allein wider die Kir-
chen / sondern auch wider Andream Carlostadt vnd
Thomam Müntzer / welche zu der zeit dise trennung
weiter trenneten / So lang das mir Gott ein auge gar
öffnet / das yhe mehr ich vmb mich sahe / yhe we-
niger mir der handel gefallen wolt. Ich begunnet zu
riechen / das die sache nach fleisch stancke / darumb sie
mir von tag zu tage abstarb / noch kundt ich nicht an-
ders / ich must darynne bleiben / weil sie mich mit ei-
nem schleyer angebunden hat. Wie aber ditz von iar
zu iar /

zu iar/mehr vnd mehr geschach/habe ich anderswo
geschrieben. Die leng öffnet mir mein Herr beide
augen / thet die Saulischen schuppen darab / name
weg den fuhang von meinem hertzen / vnd füret
mich aus der Luterischen Synagog / vnd zeiget mir
sie do allererst. Denn weil ich drinnen war / kundt ich
sie so eben nicht ansehen / als nu weil ich heraus bin.
Gott habe lob vnd danck. Ist ymand durch mich
verfurd / so ist's mir hertzlich leyd / bitte vnd flehe auch
Gott fur alle die ich yhe vormals geleret habe / das
ers mit seinem geist erstatte ynn aller hertzen / wo ich
zu viel oder wenig geleret oder gethan hette. Sind die
Pfarckindere / so ich gehabt / rechte schefflin / so sollen
sie billich yrem hirten herwidder folgen / dem sie hyn
gefolget haben. Darumb schreye ich zu ydermans
oren / wer mich sectisch gehort hat / der höre mich nu
auch Kirchisch / Wer nicht wil / der fare hyn / Ich
bin seines verderbens vnschuldig fur Gott vnd dem
Keiser. Inn Sachsen habe ich dise letzte zwey iar mei-
nes diensts (gelobt sey Gott) die heubtlere Christi-
cher gemeyner Kirchen von der Rechtfertigung wider
die secten mechtig getrieben / hoffe / die fromen lent-
lin / welche ich noch ynn meinem hertzen vmbtrage /
sind dardurch gebessert.

Nachsagen kundt yhr mir auch nicht (wie wol es
etliche nicht lassen) das ich mit geschencken oder zu-
sagungen herrlicher Condition verruckt / von euch
gangen sey. Den ich weder von geschencken noch zu-
sagungen weis / der geschencke vnd gaben beyde gros
vnd kleyn / habe ich mein tag wenig gesehen / Were
gut / das yhr also wenig von geschencken wisset / als
ich. Grosser ampt anbietung habe ich noch nirgend
D gehört

gehört. Das weys ich wol / das ich ein gut ierlich
einkomen mit der secten vbergeben habe / vnd das
auff niemands vertröstung / das weys Gott / Darzu
so bin ich / Gott lob / itzt blos gar gnug / habe oder
weys wedder zyns noch renth. So mirs vmb gut vnd
ehre zuthun gewesen / furwar ich were blieben / do ich
war. Nu habe ich das paradys nicht vmb eine scheu-
ne voller fruchte verkauft wöllen / habe des auch nie
rew gehabt. Mein trawe ist / das / der einen ketzer spei-
set / künde vnd werde auch einen Christen speisen / wie
wol vngleich.

Auch kan keyner sagen / das ichs aus furcht des
Keyfers gethan habe / als ein Creutzflüchtiger. Ich
habe dise faction aus furcht des strengen Gottes ver-
urlaubet / wissend / wie er die abtrünnigen beyde hie
vnd dort visitiren wirt. Das Creutze habe ich also ge-
flogen / das ichs nu allererst / Gott lob / erfinde vnd
erhebe. Erkenne nu / warumb doch der Judischen
Synagog zorn so vnmeslich gros vnd bitter vber
Paulum war / do er Saulum (den kirchenfeind) abge-
legt hatt. Ich mag hie nicht klagen / sonst soltestu /
mein leser / wunder hören / wie grawsamlich sich die
Beerin wider mich auff lehnet / darumb das sie yrer
iungen fur mir fürcht.

So ist auch das erlogen / das etliche sagen / ich
sey Luterischer part aus rach meines gefengnis ynn
Sachsen entgegen / syntmals ich der sachen lange zeit
zuor ein vngunst gefasset hatt / das beweyfen meine
büchlin vnd brieff / auch lebendigen zeugen / Darzu
müssen es auch mein herren visitatores bekennet / wel-
che auch zuor yr mütlin an mir wol abgekület het-
ten / vnd

ten/vnd künstlich versucht/ob sie mich widder Lute-
risch hetten machen mögen. Ich wil vom gefengnis
nichts sagen / sondern der durchleuchtigen Hertzo-
gen von Sachsen dran verschonen. Die rach ist nicht
mein / ich habe sie abgeschworen / sondern Gottes.
Was ich ynn dem fall vnd anderem gelobet habe/
das wil ich durch Gott vnuerprüchlich halten / vnd
sol nymmer mehr kein mensch anderst erfahren. Es ist
vnd bleibet die eynige vrsach/warumb ich diser part
müssig zugehen gedencke/Nemlich/das ich wissens
weys/das sie auff beltzermeln stehet/vnd yrem falle
nahe ist.

Mir geschicht auch vnrecht / das sie mir schuldt
geben/ich habe etwas sonderlichs/aber nichts guts
fur/vnd wölle ein new secten anrichten/schuler nach
mir zihen zc. Also mus ymmer ein lüge die andern trei-
ben/bis die vnuerschampten neydischen lügner auff
yrem falen pferde befunden werden/zu hon vnd spott
yrer vnd gantzer secten. Ich weys von nichts sonder-
lichs das ich furhabe/weys auch von keiner newen
secten/so war Gott lebt/sondern begere das Alt/das
etliche hundert iar durch den eyntrechtigen consens
der gantzen Christenheit stettiglich gewesen vnd ge-
halten ist/Gott zu ehren/vnd allen menschen zu nutz
vnd seligkeit. Das vnd kein anders habe ich fur/nem-
lich/das es recht vnd Gott wolgefellig zu gehe ynn
Christlicher Religion / vnd das / nicht wie du oder
ich nach vnseren köpffen furgeben / sondern wie es
vor alters war. Erstlich nach heyliger schrift aus-
weysung / darnach nach Apostolischer satzung /
Zu letzt / nach der Veter vnd Synoden haltung /
vnd nach Christlicher / andechtiger / löblicher ord-
nung.

nung. Ist das etwas sonderlichs / eygens oder neues
furgegeben?

Vnd wie tharstu mich mit dem heffigen namen
der secten berüchtigen? Welche secten richte ich an?
Wie heisset sie? Vnter was schein? Welche sind die
bücher / predigte / rede / rethe die do drauff gehen?
Wo sind meine Jünger? wo ist die stadt / darynn ich
sie anheben wil? wer ist mein Patron / mein Mece-
nas / mein schutzherr? O du vnreiner geist / du be-
triebliche listige schlange / kanstu mich sonst nicht vn-
terdrücken / denn mit vnwarheit? Arweia / man mer-
ckets nicht / das du andere leut newer secten gern be-
schuldigen woltest / auff das man die Luterische ertz-
secten vbersehen solt / ia fur die waren Kirchen hal-
ten / gegen welche alles secten vnd Kotten seyen / was
nicht mit yr stimpt / Noch nicht. Die leute sind nicht
plöcher / das sie die freyden nicht verstehen solten.
Man weis / man weis / sage ich / das yr / yr / sage ich /
ein neue secten vnd Kotten angerichtet habt / vnter
Euangelischem schein / darauff gehen alle ewere bü-
cher / predigte / rede / rethe / conspiration / coniura-
tion / bündnis &c. Ewer Jünger sind bekant / des glei-
chen ewere stedte. Item ewer ruckhalter / beschirmer /
erhalter &c. Kürtzlich nichts gebricht euch was zu ei-
ner secten gehört / noch thüret yr / euch zu beschö-
nen vnd decken / andere mit diser kolen beschmitzen / vnd
fur rotten ausschreyen / die doch allein allen secten
fetnd von hertzen sind / vnd nichts denn eynigkeit ge-
meiner Kirchen tag vnd nacht mit bitt vnd gebet / mit
reden vnd schreiben auffss höchst begeren. Der Herr
gebe / das ewere ruckhalter / die fromen Fürsten vnd
stedte / so darauff geredt / ein mal nach dem grunde
des handels trachten mögen / Amen.

Domit

Domit mich aber die boshafftigen buben deste
schnöder vnd grewlicher fur aller welt mechten/hab
ben sie es nicht bey schlechten scheltworten bleyben
lassen/Auch nicht darbey/das sie mich bisher vber
aus wol gezwingelt vnd geteuffert haben / sondern
habens weyter gewaget / vnd mich bis auff s enfferst
vnd allerschmelichst gelestert / sagende / ich sey ein A
rianer vnd Macedonier. Sehet lieben freunde / sind
mir das nicht reyne Euangelische brüder? Was sol
ich doch zu diser vnleydlicher vnuergleichlicher le
sterung gedencken oder sagen? Schweige ich darzu/
so werd ich billich als schuldig erkant / Solichs ver
antworten / so weys ich nicht / was wort ich brau
chen sol? wie oder wo ich anheben / wie oder wo ich
auff hören soll? Denn alle rede sind mir viel zu we
nig / dise heftliche makel abzuwischen / O der Euang
elisten / oder wer yr seid / wie möcht yr doch das ei
nem menschen thun? was gelustet euch domit? was
nutzet es euch oder ewer sachen? was seid yr nu frö
mer vnd gelerter?

Ich wil dir aber Christlicher Leser gar nicht ber
gen / woher sich dise lesterung erspunnē hat. Vor dreiz
en iaren kam zu mir auff mein pfarr ynn Sachsen ein
Magister aus Wittenberg mir vnbekant / vnd bege
ret / das er durch meine hilff ein mondlang herr Wer
ners von Stehaw bücher / welcher bey vns wonet /
kürtzlich durchlauffen möge. Ditz habe ich ym ynn
keinen weg abzuschlagen gewisset / sondern seiner wol
scheinende begere der Bibliothek eynfeltigs gemüts
behülfflich gewesen / ym ynn eins andern haus ein
kamer bestellt / darynn er lese / vnd ym brüderlich ge
dienet / als zu gemeynem studio. Do er nu / was er
D iij wolt /

wolt/gelesen hat/keret er widder nach Wittemberg.
Darnach vber ein halb iar/do er gar aus dem lande
war/erhebt sich ein gerücht/wie Joannes Campa-
nus(denn so hies er)wider die Trifaltigkeit soll dispu-
tiren wöllen/welchs mir ein seltzams war / also/das
ichs gar nicht glauben kundt / weil ich solchs nie /
auch ynn der kleynesten syllaben von ym vermerckt
hette/vnd er sonst so lauterlich von des glaubens sa-
chen zu reden wisset / Vber das kundt ichs auch des
halb nicht glauben/weil er der heyligen vetter bücher
bey vns gelesen hat/sonderlich Basilium / Athana-
sium/Dilarium/Cyrellum / Ambrosium / Augusti-
num / welche alle auffss hefftigst die allerheyligsten
Trinitet widder die meynedyge ketzerey verteydigen.
Die leng brachs laut aus/er hett ein buch darnon ge-
schrieben / welchs ich aber nicht glauben wolt / bis
mir das Luterus zufalls selbs sagt mit anzeygung/
wie vnd was es were / aber das buch zeyget er mir
nicht/So habe ich synt der zeit den selbigen Campa-
num wedder gesehen oder gehort / auch ym wedder
geschrieben oder mir von ym schreiben lassen/wenig
oder viel/Dabe auch synt dem gerücht grossen ekel
an dem menschen gehabt/also / das mir auch sein na-
me vnd gedechnis gewidert hat. Zum vberflus habe
ich offft gesagt/so ich das bey ym gewußt / ich wolt
ym vnters angesicht gespirtzt haben / geschweyge /
das ich ym zu eincherley bestellung gedienet haben
sol ꝛc. Dise Narration als glaubwürdig wil ich mit
hundert zeugen bewerren.

So frage ich nu dich / mein bruder / kanstu auch
hyraus schliessen/das ich wider die heilige Dreyfal-
tigkeit sey? Richte recht/vnd sage dein duncken/denn
ichs

ichs bey dich vnd alle menschen stelle? Ist einer
drumb ein Jud/das er einen Juden herberget / ia
wenn er darzu nicht weys/das der gast ein Jud ist/
denn es ia niemand an seiner stirn geschrieben stehet/
was er sey? Argwons kündt ich mich nerlich erwe-
ren/wenn ich genanten Campanum vor gekent hett/
oder hett yn geherberget nach ausgangnem gerücht/
wie wol ich yn/ynn mein haus nicht beherbergt/son-
dern hab sonst aus liebe geholffen/das er vnter dach
genommen worden ist/bis er die heiligen Lerer braucht
hett. So wil ichs auch auff meinen höchsten eyd ne-
men/vnd ists damit zu wenig / auff mein letzte hyn-
fart/das mir genanter Campanus nie ein wort wed-
der heymlich oder offenberlich gesagt hat / das do
auch auffs wenigste wider die heylige Trifaltigkeit
gelaut hette/wie ich denn ditz nach notturfft wörti-
scher verantwortet hab an den Churfürsten zu Sach-
sen/vnd mündlich itzt zu letzt bey dem Luter/do er mich
denn auch aus der verdacht liesse/item ynn der ange-
fodderten Confession zu Beltitz / vnd sonst ynn einer
Lateynischen Apology. Vnd ich setze es / wenn er
gleich seines yrsals gegen mir gedacht hette (wie er
denn warlich warlich nicht gethan) so folget drumb
nicht / das ichs so bald mit ym halten solt / Sonst
müßet ichs auch mit den Juden halten/weil ich von
vielen yren thörichten wahn gehört habe / Darzu
so müßet ichs auch mit den Sarracenern halten/weil
ich yren verfluchten vnglauben ym Nicolao Cusano/
ym Breytenpach / ynn Croniken / vnd ynn des Si-
benbürgers buch gelesen habe?

Daher ich mich deste mehr verwundere/was sich
doch die heubter Luterischer part zeihen/das sie mich
nu auff

nu auff ein newws zu lestern anheben / so sie doch wol
anderst wissen. Vnsterblicher Gott / was thut neyd
vnd hass nicht / weñ er einen zu blenden beginnet. Sie
hetten mich eben so leichtlich lestern künden / ich wez
re der Teufel selbs / oder gleubet nicht / das Gott ym
himmel sey / als das sie mich Arianisch lestern / weil
eins so war ist / als das ander.

Ich sage aber vnd contestir fur Gott / der do rich-
ten wirt die lebendigen vnd todten / vnd ruffe es aus
fur aller welt / das mich die lesterer beliegen / als die
vnmänner / vnd das sie mir auffzulegen begeren / das
sind sie selbst / nemlich ketzer / rotten / schwärmer / fal-
sche Propheten / Dypocriten / Antichristen / vnd das
ichs alles mit einem wort begreiffe / verfürer der ganz-
zen Christenheit / Mein tage weil ich von ketzerrey ge-
hort oder gelesen habe / bin ich keiner so feind gewes-
sen als der Arianischen / welche yr tödlich gift aus
Cherynto / Debione / Photino ꝛc. gesogen / vnd ynn
den Aetium vnd Eunomianum ꝛc. weiter gegossen
hat. Des beruffe ich mich auff alle meine Pfarrkin-
der / ynn Düringen vnd Sachsen / Desgleichen auff
alle meine schrift / vnd wenns möglich were / wolt
ich wünschen / das mein hertz ein fensterlin hette /
dardurch yderman sehe / wie vnrecht mir armen ge-
schicht. Es ist kündtlich / mit was vleis vnd arbeit ich
iung vnd alt allweg geleret / ia ynn sie gepfropffet
habe die gleichheit Göttlicher natur ynn dreyen per-
sonen / vnd sehr viel von dem Monousio allweg ge-
redt / noch mus ich disen Euangelisten Arianus vnd
Macedonianus seyn / vnd sol mich kein Confession
helffen / die doch sie vnd alle andere helffen sol.

Ich wil

Ich wil wetten/ob einer ym lande die zeit seines
pfarampts öffter / hefftiger vnd hitziger dise beide
ketzerey verdampt / vnd dargegen die allerheyligsten
Trifaltigkeit so herlich gepredigt vnd gepreiset habe/
als ich/noch mus ich ketzern. Bin ich aber Arianus
vnd Macedonianus / so mus solchs Athanasius
auch seyn (das doch vnmüglich ist / weil er yhener
gröste feind war) denn ich halts mit seinem Symbo-
lo Quicumq;. Des gleichen der Alexander/so vor ym
war/mus auch ketzern. Kurtzlich/ich halts fest mit
dem simbolo Apostolorum/mit der Regula fidei ym
Ireneo vnd Regula veritatis ym Tertulliano/mit der
profession Damasi/mit der exposition des glaubens
Gregorij Neocesariensis ym Eusebio/das ist/mit der
heyligen gemeinen Kirchen. Also habe ichs bisher
gehalten / geglaubt vnd bekant. Also halte / gleube
vnd bekenne ich. Also wil ich halten/gleuben vnd be-
kennen/bis ym meine gruben/des helffen mir die na-
men drey / Gott vater / Son / vnd heyliger Geist hoch
gelobt vnd hocherhaben vnd hochgesegnet ym ewig
keit zu ewigkeit/Amen.

Aber was bedarffs so grosser schutzrede/die weyl
alle die mich kennen/die kennen auch meinen gesun-
den richtigen glauben / vnd lachens / wenn sie dise
meyne lesterer hören/als der vnsynnigen plauderer/
die vor has nicht wissen/was sie thun. Das thun sie
aber/sie wolten mir nicht allein gern meine ehre ab-
schneiden / sondern auch meinen glauben/also/das
ich wedder fur Gott oder der welt töge/vnd mich
beide des hymels vnd der erden berauben/das were
yr lust. Sie wissen das der name Arius zu mal gewo-
lich zu

lich zu hören ist bey allen menschen / darumb dünckt
er sie bequeme / domit sie die vnschuldigen beschwe-
ren / wie auch der thewr man Erasinus mit disem
schandfleckten von seinen misgönnern geletzt ist / wel-
chen ich gern zum gesellen habe. Aber sie sollen mir /
ob Gott wil / bey keinem bidderman schaden / vnd
wenn sie mich noch scheuslicher insamirten / wie ich
bey ynen bin oder heisse / gilt mir eben viel. Es ist mir
gnug / das sie liegen / vnd sich selbs schenden / fallen-
de ynn die gruben / die sie mir gegraben hatten / Tro
ein teil sollen noch / ehe lang vergehet / yr eygen maul
zur deschen machen / vnd meinen glauben durch yre
lippen widderumb ehren / durch welche sie ynen ge-
schendet haben.

Mit Jodoco Jona habe ich diser Injurien halb /
domit er sampt anderen yrer part predigern / mich
auff's hertist beschweret hat / newlich expositulirt /
darynn ich die adder / daraus diser feindisch mörderisch
hass her quillet / gerurt habe / vnd ist warlich war-
lich keyn andere / denn das ich nicht mehr wil Lute-
risch seyn / das dringet ynen durch lung vnd leber.
Darumb tasten sie mich an / nicht wie die schefflin
vnd dawben / sondern wie die lewen vnd drachen /
stehen mir nach leib vnd leben / ehre vnd gelimpff /
wie sie allein zu Erfurd beweiset / wil nicht von an-
dern orten sagen / Vnd yro doch keyner nie so redlich
gewesen / der mir vnter augen hett etwas sagen dürf-
fen / sondern fliehen mich / stechen vnd schiessen hin-
den zu / das ich mich fur ynen nicht gnug verwaren
kan. Endlich / sie sind so rasend worden meiner befe-
rung halb vnd des Ausgangnen büchlin's defensionis
bonorum

bonorum operum / das etliche meynen / sie müssen
vbel fürchten / yro triegligkeit kome vollend an tag /
Denn sieben Papistische Doctores haben ynen vor
so gros leyd vnd vnruhe nicht gemacht / Mein freude
ist / das sie mir mit warheit vnd gutem gewissen wed=
der ketzerey noch vbelthat nachschreyben künden /
denn ich ynen / gelobt sey Gott / die thür verlauffen
habe. Thun sie es aber / so wirts so war seyn / als war
es was / das der Herr dem Keyser den zyns zu geben
verboten hat / vnd das S. Stephan widder Gott le=
sterwort geredt hatte / vnd das Delias das volck auff
wödig gemacht hatte / vnd das Joseph seins herren
weib beschlaffen hat / vnd das die ersten Christen yre
eigen kinder gefressen einen Eselfopff angebett / vnd
bey yren mütter vnd schwestern geschlaffen hatten /
also war es was / das Athanasius ein ehebrecher vnd
zauberer was. Juncker Neydhart / der falsch zeuge
(den Gott vnter sechsen hasset) schuldiget dise genan=
te laster vnd vntugent / aber es fand sich endlich / das
es alles erlogen vnd erstuncken was / zu grosser ewiger
ehre der vnschuldigen brüder / vnd zu vnauffhörlich
cher schande / schmah vnd peyn des grossen drachen
der alten schlangen sampt yren mit verklegeren / verre=
tern vnd verleumbdern. Darumb fürchte ich yre fed=
dern nicht fast / aber yre tyranny vnd langen arm
mus ich etwas fürchten. Der Herr wolt mich aus
yrem rachen gnediglich erretten / Amen.

Oder ist's denn so vbel gethan / wenn einer vmb
wendet? Thet Sanct Augustin vbel dran / das er von
der Manicheischen secten zur Kirchen trate? Sagt/
wer verdachts ynen? Catholici odder Schismatici?

L ij wer

Wer verdachts Eusebium Cefariensem / das er die
Arianische gotslesterung vbergabe / vnd sich widder
zur Kirchen fand? Wer verdachts Vincentium vnd
Agapetum / das sie von Macedonianischer bosheit
widder zur Kirchen fielen? Wer verdachts den Eu-
syriden den bekennen / das er die Encratische heuche-
ley verliesse? Wer verdachts Tertullianum / das er
nicht mehr Montanisch seyn wolt? Wer verdachts
Beryllum vnd Pelagium / das sie widder zu synnen
greiffen? Des gleichen den Berengarium? Wanne/
wie werden die verlassenen secten vber dise mit yren ze-
nen zusammen gebissen haben / wie werden sie dise ver-
maledeyet haben / als gottlos / trewlos &c. Denn ein
yede sect gibt yre Apostaten dem teuffel / wie auch die
Juden die so sich von ynen zum Christen glauben
teuffen lassen. Aber las gehen / fluchen sie / so lobet
Gott / Bin der secten Apost / so sind sie der Kirchen
Apostaten / Verfolgen sie mich / so verfolget sie Gott
widder / beyde hie vnd dort / Sie künden mir nichts
fursagen / des tröst ich mich / Dabe ich etwas von
ynen gelernt / so habe ich irzt des grösser mühe / bis
ichs widder verlerne. Dabe ich etwas bey ynen ver-
dienet / es kost mich mein erbeit vnd pfarrsorge / Umb
sonst hat mir yro keiner einer hand voll gersten werdt
yhe gegeben. Ich bezenge fur Gott / das ich niemand
zu leyd dise part faren lasse / vnd niemand zu liebe / die
Kirchen erwele / sondern meiner seelen zu gut / vnd al-
len die mir folgen wöllen.

Nu wil ich yderman kürtzlich anzeygen die Kir-
che / darein ich mich gegeben / wie wol ich mit dem
leibe seyn vnd wonen mus / wo ich kan / Bitte alle /
sie wöllen

sie wöllen ditz was es ist / mit eynfeltigem auge ver-
lesen.

Die Kirch ist eynig / gleich wie Christus yr warer
Brentgam vnd Weibt eynig ist / Sie ist die stadt
Gottes / der recht Tempel vnd Tabernakel Gottes /
Sie ist der berg Sion / der lustig weingart / der ver-
schlossen baumgart / der fruchtbar laubicht schön öl-
baum. Dise hat Gott selbs gegründet / vnd auffgeba-
wet auff den grund der Aposteln vnd Propheten /
an welchem baw Ihesus Christus der son Gottes
der eckstein vnd knauff ist. Andere lebendige steyne
sind die waren Christen / vom Abel dem gerechten
an / bis auff den letzten gleubigen / welche zuhauff
ein geistlich haus ia körper machen / darwidder die
helle pforten nichts vermögen.

Ditz geistlich haus hat Gott zubawen angefan-
gen von anfang der welt / vnd sonderlich nach seiner
heyligen Menschwerdung / durch aussendung seiner
Apostel ynn alle welt / mit verkündigung des Euan-
gelij / dardurch sie erst gebawet ist zu Jerusalem / zu
Antiochia vnd Rom / als an den heubtörten der welt.
Das wörtlin Kirche kompt daher. Vorzeiten hies
man die heuser / darynn die Christen versamlet / auff
Kriechisch Kyriaca / das ist / des Herren heuser /
welchs wort gemeyn wart / das yderman nennen
kunt / aber die lenge warts verkürtzet / das man es nu
halb nennet / Kyrch. Die Sachsen nennen es seinem
ursprung neher / Kyrke. Man hies solche heuser auch
semnia vnd semnegorias / das ist / zuchtheuser. Aber
der eltist name ist Ecclesia / des brauch die schrift /
vnd heyst auff deutsch ein versammlung / verstehe der
E iij Christ-

Christgleubigen. Nu ist's ynn gebrauch komen/das man das haus/darynn die versamlung ist / ecclesia nennet nach der Synecdoche / vnd das man das wörtlin Kirche vnd ecclesia für ein ding helt / so doch eins dem andern nicht antwortet / Do ligt nu wenig an / allein das man es wisse / was ein yglichs wort nach seiner art bedeute / damit niemand betrogen werde.

Weil nu die Ecclesia oder Kirche /sonderlich ynn der stadt Rom/durch wirkung Gottes / vberhand nam / vnd doselbst die bestendigsten vnd meysten Christen worden /sonderlich weil aldo der sitz des Apostels Petri letztlich was sampt so vielen allerheyligsten nachfolgern / Auch weil Rom der welt heubt vnd fürstin was / kam es / das man die Kirche nach der stadt zunamet / vnd sprach Ecclesia Romana / gleich wie man auch sprach / Ecclesia Jerosolymitana / Ecclesia Antiochena / Alexandrina / Lugdunensis / Nicht das die selbigen stedte die Kirche gemacht / erfunden oder gewalt vber sie gehabt / sondern das sie Gott an den selbigen örten furnemlich gegründet / gebawet vnd gezieret hat / Ir vrsprung ist sonst viel höher vnd edeler / denn das sie solt nach stedten diser welt genent werden / Noch mus sie solche bekentliche zunamen haben / damit man wisse / wo sie anfenglich auff komen sey. Sonst weil sie vom hymel kompt / vnd yr herr Christus ist / sitzend zur rechten Gottes / sind yr alle yrdische namen vngleich / vnd viel viel zu gering.

So mögen wir nu die Kirchen Christi / die Römische

mische Kirchen heissen / als vnter oder ynn der wir
an disem ort der welt sind / vnd sonderlich als die wir
erstlich durch Bonifacium vnd Kilianum aus Römischer
Kirchen gesand / zu Christem glauben von an-
geborner heydenschafft bekert sind / Auch vmb des
willen / das wir vnter Römischen Keyserthum sind /
welchs ynn Propheten vnd Aposteln bestettiget ist /
Item vmb der geistlichen Monarchy willen zu Rom.
Die Orientalischen mochten die Kirchen Christi / die
Antiochenische oder die Alexandrinische Kirchen nen-
nen / weil sie des teyls der welt waren / vnd die Apo-
steln sampt den Apostolischen auch doselbst gefessen
hatten. Auch vmb des willen / das sie zu zeiten etwa
andere breuche vnd gewonheit hielten / denn die Römische
waren aber doch beide einerley lere vnd glau-
bens / wie sichs gehört. Also nennen wir die Kirche
Christi vntern Kriechen / die Kriechische Kirche / dar-
gegen die vnsere vnterweilen die Lateinische genant
wirt / vnd ist doch alles ym grunde Ein Kirche / denn
dise vnterschiedliche namen benemen yrer eynigkeit
aller ding nichts. Vñ S. Hieronymum zu Euan-
dro / Man sol nicht meynen / das die Römische Kir-
che ein andere sey / denn der gantzen welt Kirche / in
Gallia / Britannia / Persia / Oriens / India vnd al-
lerley vöcker beten einen Christum an / vnd halten ei-
ne Regel der warheit. Vñ Ireneus lib. i. cap. iij. Die
krafft der lere ist eynig / das auch die Kirchen so da
ynn Germanien gegründt sind / nicht anderst glauben
oder leren / auch nicht die bey den Iberis / Celtis /
ynn Orient / ynn Egypten / ynn Libien / vnd die mit-
ten ynn der welt sind.

Doher wirt sie Catholica genant / Nemlich / das
sie vber

sie vberal gehet vnd reychet / von auffgang der Sonnen bis zu yrem nidergang / ynn alle welt / yñ alle zeit / vnd begreiffet alle menschen nahe oder fern / iung vnd alt / was nur ynn einigkeit des geistes / des glaubens / der lere vnd lebens erfunden wirt. Apostolica heisst sie darumb / das sie von den zwelff Aposteln erst gepflanzt / vnd mit yrer predigt besenchtiget ist / das sie do her wuchs / wie ein schöner palmenbaum. Diser Kirchen lebendigs gelied bekenne ich mich / vnd sonst keiner andere / wie denn kein andere ist / so wenig kein anders Euangelium ist / denn das die Kirche von Aposteln hat / vnd nu bey anderhalb tausent iar gehabt hat.

Was gebricht dir nu hyran du widersacher? Erstlich ich sol nicht sagen Römische Kirche / auch nicht Catholica? Denn die zwey wort sind dir negel ynn deinen augen. Dey warumb sagt yr denn Wittembergische Kirche / da doch keine ist / tilget Rom aus / vnd setzet ewer ding hinzu / gleich auch wie yr Catholica ausgekratzt / vnd Christiana ym Symbolo geschriben habt? Wenn man die Römische Kirche nennet / so spitzet yr dargegen / wenn man aber die Wittembergische nennet / so lachen die Engel ym hymel. Ist's so recht?

Vnd wenn du gleich sagest / dein ding were Catholica ecclesia / so würd oder kündt man dir's doch nicht glauben / denn die schrift / Cyprianus vnd Augustinus sagen nein darzu / Darzu so wegert sich auch des worts natürliche deutung / Ja warlich / man wil deinen winckel Catholica nennen / wenn die leute pfifferlinge weren. Ist dein winckel Catholica / so mus die erste

Die erste Kirche nichts seyn / weil sie widereinander
sind. Ist aber die erste Kirch nichts / so folget vnwis-
dersprechlich / das die Christenheit ynnwendig zehen
iaren allererst hat angefangen / vnd wir sind alle hey-
den gewesen / bis Luter came. So es denn dise meyn-
ung hat / so thun die Baltasarischen noch nicht
vnweislich dran / das sie sich also teuffen. Ursach /
nach Luters furgeben / ist vor keine Kirche gewesen.
Ist aber vor keyne Kirche gewesen / so müssen wir ge-
wislich noch vngetaufft heyden seyn? Ich hoffe /
man mercke schier / wie vns der deutschen Prophet
(Planet) auff's eyss gefüret habe.

Ich sage / das die alte Kirche / man heis sie Rö-
misch / Antiochenisch oder Gretisch / so da funffzehē
hundert iar her gestanden vnd geweret hat / allein die
einige Catholica / Apostolica / Christiana vnd Au-
thentica sey. Vnd ist vnmüglich das ein andere sey /
gleich wie vnmüglich es ist / das ein ander Christus
sey. Alle ketzer haben eygen Kirchen (secten) ein zeit
lang gehabt / zu bewerung vnd offenbarung der ge-
rechten / war ist's / aber keiner hat dise gehabt. Vnd wie
kündt yro einer dise gehabt haben / so er von diser als
trewlos abgefallen war? Luter hat auch seine eygen
Kirchen (denn die wespenn machen auch rössen / den
binen gleich) so lang es Gott verhengt / aber ym ist
ein pflöcklin darfur gestossen / das heist Catholica /
domit er sich der waren vnd eynigen Kirchen mit gu-
tem gewissen nicht rühmen thar. Luter hat vnd füret
auch die schrift / war ist's / aber er schafft nichts dar-
mit. Sanct Petrus stehet yhm ym wege / wie der En-
gel dem Balaam / sprechend / Die schrift ist nicht
F eygner

eygner auslegung / als solt er sagen / Gesell / du must
die schrift nicht deuten / wie du wilt / Wenns des
gulte / so were keine ketzerey vnrecht.

Auff das du aber nicht gedechtest / die Römische
Kirche were ein new pfeffisch wort / so vernim aus den
aller eltesten lerern / die bald nach den Aposteln gelebt
haben / was sie von yr schreiben. Ireneus sagt lib. iij.
cap. iij. Zu Rom ist die grösste vnd elteste vnd allen be-
kante Kirche / von den zweyen Aposteln Petro vnd
Paulo gegründet vnd gesetzt ꝛc. Tertullianus de pres.
heret. do er viel von Apostolischer kirchen geredt hat /
sagt er / Inn Welschlande hastu die Römische kir-
chen / von welcher vns auch authoritet gegenwertig
gesetzt ist. D ein selige kirche / welcher die Aposteln
die gantze lere mit yrem blut vergossen haben ꝛc. Wer
do wil / der lese daselbst mehr darvon. Item lib. iij.
contra Marcionem. Lis Ireneum lib. v. cap. ij. vnd al-
lenthalt. Fragstu / warumb reden denn Ireneus vnd
Tertullianus so eben von Römischer kirchen? Dar-
umb / das zur selbigen zeit auch secten auffstunden /
welche sich den Titel warer Christlichen kirchen zu
eygneten / wider solche preiseten vnd erhielten dise die
Römische kirchen / als die einige Apostolische. Glei-
cherweis sol man sie gegen diser secten vnd yren schwe-
stern erheben. Sprichstu / Ja wenn sie itzt so reyn we-
re / wie das mal / so möcht ich auch bey yr bleyben.
Antwort / Also höre ich wol / wenn dein vater voller
frantzosen were / so woltestu von ym gehen / als ob er
dein vater nicht were? Sag mir eins / Bekennestu /
das die Römische kirche zur zeit Irenei vnd Tertullia-
ni die ware Kirche gewesen sey? Du kanst es nicht
leucken /

leuckten / Wolan / so mustu auch bekennen / das sie es
noch sey / weil es itzt eben noch die ist / so auff yhene
zeit war / allein das sie nu elter / schwacher / runtzlich-
ter vnd vngestalter ist. Sie ist noch das alt haus Got-
tes / die alte stadt Gottes / der alt recht Tempel Got-
tes / der auff yhene zeit war / allein das er nu etwas
verfallener vnd vngeschmückter ist / denn er auff yhe-
ne zeit war. Sie ist noch der alt weingart des Herren /
der da vor war / ausgenommen / das er itzt etwas weni-
ger fruchte tregt / welchs nicht des weingarten schult
ist / sondern der verseumlichen erbeiter / so darein ge-
schickt waren. Sihe / hie bistu verstrickt / vnd must
verstummen.

Sprichstu / wir sind die dise alte Kirche fegen /
vnd widder zurichten. Antwort / Ach Herr Gott des
fegens / vnd zurichtens / wenn yr noch dreissig iar also
fegen vnd zurichten wolt / so solten alle auserweleten
Gottes wöllen / das sie schon tod weren / Soltet yr
die alte Römische Kirche fegen / so yr sie des Teufels
nest vnd Satans Synagog nennet / welgert sie on vn-
terlas ym kot mit eweren sewrüsseln auff's aller schme-
lichst vnd bitterst. Solten yr sie (sage ich) zurichten /
darnon yr apostirt habt / verhasset vnd verfolget alle /
so noch drinne sind / vnd scheltet die Antichristen / die
Cainischen / die Baalischen / die gotlosen / die heuch-
ler zc. reisset alle gute ordnung vmb / vñ machts nicht
besser / leret newe lere / welche die alte Kirch nicht ken-
net / zubrechet / raubet / vertreibt / ordnet / beschliesset /
thut vnd lasset ewers gefallens / vnd sehet wedder
Gott oder den Keyser an / Wenn yr die alte Röm-
sche Kirche hettet fegen wöllen / so hettet yr sie nicht
gar müssen vmbkeren / vnd mit feusten drein schmei-
sen. Fegen

sen. Fegen vnd abbrechen ist zweierley. Einen dopff
scheuren / vnd wider ein stein schlagen ist weit von ein-
ander. Aber yr müisset euch / nach gethanem schaden /
mit worten flicken vnd behelffen / wie yr kündt / Al-
lein das hat den ritten / das euch ewere eygen bücher
verraten.

Darumb ist's nichts mit ewerm kircherhümen /
darab yr euch selbst durch hoffart geschnitten habt.
Die kirche ist der gantz rock Christi / ewer ding ist ein
falte / daraus gesondert. Die kirche ist die Arca Noe /
ewer ding ist ain bret darab genomen. Die kirche ist
der gantz leib / ewer ding ist ein arm darab gehawen /
Warumb? Darumb / das die ewere nicht die gantze
ist / gleubet / leret / helt vnd thut auch nicht wie die
gantze. Sie bringt frembd feur zum altar Gottes /
das ist / frembde lere (ich rede itzt mit Ireneo) derhalb
wirt sie vom hymelischen feur verzeret werden wie
Nadab vnd Abiu. Sie widderstehet der warheit vnd
hetzet die leute widder die kirchen Gottes / derhalb
wirt sie die erd verschlingen wie Dathan vnd Abiron.
Sie zurscheydt vnd trennet die cynigkeit der kirchen /
derhalb wirt sie den lohn mit Hieroboam nemen.

So ist nu die Römische kirche erstlich ein dochter
Jerosolimitanischer kirchen (welche ein mutter aller
kirchen genent wirt in Dist. Trip.) vnd mag nu auch
mit guten ehren den Muternamen führen / welcher kin-
dere zu seyn / wir vns frewen sollen / weil sie also hey-
lig loblichs anfangs vnd vrsprungs ist. Das erst-
ling dises teigs ist heilig / Die wurtzel dises ölbaums
ist heilig / darumb mus auch der gantz teyg vnd gantz
baum noch heylig seyn / wie er auch an ym selber ist /
an vielen

an vielen tausenden frommen Christen durch alle welt
verstreuet ynn eynigkeit des geists vnd glaubens/
welche Gott vnd yren nechsten noch dienen mit guten
wercken / mit gehorsam / vnd allen tugenten. Diser
Muter son / diser Braut ein stücklin / dises leibs ein ge-
lied / dises hauses ein stein / diser arken ein eingeschlos-
ner / diser stad ein burger / dises schiffs ein gefert / dises
ölbaums ein zweiglin / dises weinberges ein rebe / di-
ses Abrahamischen samens ein erbe / diser kron ein
fliedder / dises Königreichs ein mitgenosner ꝛc. wil ich
leben vnd sterben.

Nu vergleych den anfang der newen Kirchen mit
ditem / O Gott wie vnheilig / wie frantzösig vnd aus-
setzig ist sie ynn yrer kindheit / was wil ynn yrem alter
werden. Ist der brunn nicht gut / was wil denn guts
draus fliessen? wie kan das end zu lobē seyn / so der an-
fang gescholten wirt? Jderman fasse es zu hertzen.

Die heylige Römische Kirche (halt an dich Neyd)
ist durch die furnemsten Aposteln auffgericht / vnd
mit yrer lere / heyligkeit vnd blut eingeweyhet / bestet-
tiget vnd befestiget. Nach disen als den heubtern / ist
sie vollend ausgefüret durch yre nachfolgere Linum /
Anacletum / Clementem (welche der Aposteln Jün-
ger gewesen) Euaristum / Alex. Sixt. Telesph. Dyg.
Pi. Anic. Sote. Plenth. wie sie denn Ireneus zelet /
vnd ist mit grosser menge der Merterer bezeuget / mit
vbertrefflicher starckmütiger bekenntnis bekrefftiget /
mit vnzelichen gottgefelligen guten wercken gezieret /
mit hocherleuchter allerfurscheinlichstē Lerer schriff-
ten gepreiset / vnd wider alle einschleichende ketzerer

§ iij erhalten.

erhalten. Ach der vnſynnigen / die ſich ynn diſer Kir-
chen vnter ſolchen heyligen gottförmigen brüder
vnd ſchweſtern nicht finden laſſen wöllen.

Wer es mit der Wittembergiſchen Kirchen helt /
der hat diſe verleucknet / vnd ſtreitt wie ein Türck wi-
der alle Chriſtenheit / durch die gantze welt geſeet /
vnd tritt mit füſſen Dionysium / Iuſtinum / Iгна-
tium / Polycarpum / Ireneum / Tertullianum / Orige-
nem / Cyprianum / Lactantium / Baſilium / Nazian-
zenum / Chryſoſtomum / Dylarium / Sedulium /
Hieronymum / Ambroſium / Auguſtinum / Cyril-
lum / Theophylactum / Fulgentium / Gregorium /
kürtzlich vber hundert gnadreycher / wunderwürdi-
ger / heiliger Scriptorn vnd Veter / Darzu verdampt
er alle nottürfftige heylſame Concilien / Zu letzt ver-
lacht er der gantzen Kirchen hitorien / ſampt yrem
gantzen ſtande / Nu gehe hyn / vnd erhebe ein ausge-
worffen kuttten vber das gantz Chriſtenthum. Ja
ſprichſtu / was frage ich nach den Lerern / wenn ich
die Schrift habe? Antwort / Soltu darumb nicht
nach yn fragen? oder meyneſtu / ſie haben on ſchrift
geleret / vnd die Schrift nicht verſtanden? O du
phantastiſcher kopff / wes leſtu dich doch düncken?

Iſts nicht ein iamer (ich frage euch yr kirchliſchen)
das ein menſch allen menſchen beide die itzt leben /
vnd die anderthalb tauſet iar hie gelebt haben / aus
eygnem freuel vnd wolgefalle ſich ſelbs fürzihē thar?
Iſts nicht zu viel / das diſe leute alle commentarien
der elteſten ſtöltzlich verwerffen / vnd künden doch
on yre newen commentarien nicht ſeyn / on welche ſie
auch

auch nicht einen spruch der Schrift angreifen dürfen? So es gnug ist / das du Schrift allein haben wilt / warumb kanstu denn der newen bücher nicht vol werden / so da vber die schrift gemacht werden? Du sprichst / man sol die Schrift on commentarien lesen / vnd du thust es selber nicht / ia du hengst herter an der newen glos / denn alle andere an den eltesten. Vüberey istz / vnd ein behends ketzerfündlin / Wer das nicht reucht / der hat die schnuppen. Des bin ich gewis / das die alten Lerer die Schrift rechtsynnig ausgelegt / vnd den eynigen weg zur seligkeit darynn eyntrechtig antroffen / funden / vnd der Kirchen gezeigt haben. Daben sie vberlang ein mal geschlaffen / sind darumb nicht hyn zuwerffen / Der Lerer defension wöllen wir zu seiner zeit / wil Gott / hören.

Es ist ein gewaltige anzeigung (das ich ditz dran heffte) vnd ein starcke beweyzung / das das Lutherthum nicht die alte kirche / sondern ein newe sect seyn müsse / weil es der alten kirchen lerer nichts achtet / sondern allein der secten lerer / welchs vnmüglich were / wenns recht zugienge.

Wie heilig vnd vnstrefflich die kirche etlich hundert iar blieben sey / sagen vns die bücher. Die leng / als der Tyrannen vñ Heretiken verfolgung (die zwey hörner des teufels) auffhöret / do versucht der Satan / wie er sie auff andere wege antastet / nach dem sie seinem Reich der welt vnleydlichen schaden thete / hub an vnd reizet yre furgenger vnd viel des volcks zu fleischlichem leben / Do ym das geriete / ward schon ein gros fenster zu mehren bösen dingen auffgethan. Aber darwider legten sich gar eylend die heilige Lerer mit scharffer straffe / wie recht ist. Nichts desteweniger

ger hieb Satan furt / auff das er das Reich Christi
etwas schwечet / vnd treibs dohin / das die Pöbste /
bischoff / priester yrs ampts vnachtsam worden / vnd
begundten yrer predecessorn fusstapffen zuuergessen /
sonderlich weil die Kirche allenthalb fried vnd ruge
hatt. Mit der zeyt wart die Bibel sampt den eltesten
Lerern vngeneme / vnd wuchsen andere lerer erfur /
welche den ersten vngleich waren / Damit geschachs
das die Kirche auff alle seitten not leyd / vnd endlich
dohin fiel / wie sie noch ist / Gott ym himel erbarmt.
Vnd das ichs kurtz sage / das andere mit vielen bü-
chern thun / so finds zwey / daran der Kirchen wurde
fast geletzt vnd gemindert / auch darumb sie nicht so
ynn gutem geschrey bey den vnglenbigen ist / Nemb-
lich der vnreformirt Gotsdienst / vnd das böß leben.
Wie hie / sage ich / were es zeit / o mehr denn zeit / das
die Kirche diser zweier tödlichen drüse abkeme. O yr
öbersten / wachet auff / seid dem Christenglauben ge-
trewe / foddert ernstlich Concilia / beweget die gebre-
chen / besehet die not / thut weg was vnnützig vnd er-
gerlich ist / hawet ab was schedlich ist. Die Christen-
heit schreiet ewiges schreyens zu euch / sonderlich ynn
dem gedrengte eingefallender secten / wehe wehe / vnd
aber wehe / wo yr euch von diser allernottürfftigsten /
aller heilsamsten vnd allerlöblichsten werck den Sa-
tan durch vnsorge oder andere weltliche geschefte
abhalten vnd hindern lasset.

Dem ist leider also. Was nu? Sol man drum die
einigkeit der Kirchen zureissen / weil sie durch so viel
hundert iar her / durch des Satans künste etwas ver-
unheiligt ist? Verlies auch Moses die synagog vmb
der misbreuche vnd laster willen? Thet es Helias
oder Hieremias? S. Bernhard sahe auch der Kirchen
gebrechen /

gebreechen/sonderlich des Römischen stuls mangel/
welche bereit zu seiner zeit gros waren/sondert er sich
aber drum von yr. Der from Taulerus/des gleichen
Quicensis / Item Gerson/Valla / Picus / Weselus/
Petrus de Alliaco Card. &c. sahen auch/das nicht gar
wol vmb die Kirche stund/traten sie drum aus/vnd
machten newe Kirchen? Neyn / sondern sie schreyten
darwider / das ynen der hals kracht / verschonet
nichts/erhuben yre stym wie ein posaun/vnd verkün-
digten den Christen yre sünde / damit sie yre seele ret-
ten. Erasmus/das edele berlen/sahe diser zeit am er-
sten beide der Schulen vnd Kirchen feyle / hat aber
drumb noch kein eigens gemacht/auch ynn keins ver-
willigt. Weh gnug thut es ym vnd allen Gotsliebha-
benden/das solcher erbermiglich vnfall ist vnd so lang
wehren sol / er schweigt oder berget es auch nicht/
noch bleibt er ynn der Kirchen einigkeit/vnangesehē/
wie er darumb von beiden seitten verfolget wirt. Also
thet auch Reuchlinus/Mutianus/Longolius/Mo-
sellanus/vnd der viel mehr/so da newlich verstorben.
Stapulensis/Ahenanus/Cornelius/Crotus/Cam-
pensis/Egranus/vnd der vnzelich durch alle lande/
ia viel fromer geleter bischoff/doctores / vnd predi-
ger hyn vnd widder/haben auch einen misfall an der
vngestalt der Kirchen / aber sie scheiden sich drum
nicht von yr. Sie ist gleich wol vnser geistliche Mu-
ter/ob sie schon etliche makel/on yren willen empfan-
gen hat/Villeicht ist dise sect drum/von Gottes zu-
lassung/eingerissen/auff das die Kirche / als durch
vrsach der selbigen/deste ehe zu yrer selbs erkentnis/
Reformirung vnd besserung keme. Darumb aber ist
dise sect nicht gerechtfertiget.

Die Kirche ist/der wir alles gut/ewigs vnd zeit-
lich

Ⓞ

lich

lichs (wie vnübſch ſie do ſcheynet) nechſt Gott/zu
dancken haben/vnd nicht der ſecten. Denn ſag mir/
woher haben wir vnſere Tauffe? Die hat vns diſe
Muter widdergeperet/vnd ſonſt keine/warumb ver-
leucken wir ſie denn? warumb laſſen wir vns ein hurn
vberreden vñ yr zufallen/ſo ſie doch vnſer rechte Mu-
ter nicht iſt/wie hoch ſie rühmet? Sag woher ha-
ben wir die heilige ſchrift? von der Kirchen oder von
der ſecten? Gewislich von der Kirchen. Dat vns aber
die Kirch darumb die ſchrift vberreicht/das wir do-
mit wider ſie ſtreiten ſollen? Das were wol ein rüte ge-
macht/vber ſein eigen haut. Sprichſtu/die ſchrift iſt
von Gott. Recht/Wenn biſtu aber ynn hymel geſti-
gen/vnd ſie von Gott genomen/wie Moſes die taf-
feln auff Sinai/D grobheit der subtilen leute. Wei-
ter/Woher haben wir das erkentnis Gottes vnd des
gantzen Chriſtenglaubens? Nicht von der Kirchen?
Oder haben alle menſchen ym vmbkreis der erden
vor zehen iaren von Gott vnd dem Chriſtenglauben
nichts gewiſſet? Seid yr die erſten die es ynnwendig
zehen iaren gewiſſet haben? Woher habt yrs denn
gelernet? Aus der ſchrift? Ey iſt doch die ſchrift mit
rechtſynnigem verſtand auch vor zehen iaren geweſt/
vnd leute/die ſie geſehen haben. Aus dem Geiſt? Wo-
lan/ſo bewert den Geiſt mit zeichen/Denn yr ſelbſt
ewern Miſchwertern furwerfft/weil ſie etwas auff
bringen/das man vor nicht gewiſſet/ſo ſollen ſie ſol-
ches mit wunderzeichen beweifen. Iſt der geiſt vnd
die ſchrift mit yrem verſtand vor zehen iaren bey nie-
mand geweſen/ſo hat der Herr vbel bey ſeiner braut
gehalten/vnd ſeinen eigen mund gelugenſtrafft / vnd
geſchicht/das kein vnſeliger / yrrender / vngerechter
volck vnter der ſonn ſey/denn die Chriſten. Weiter/
woher

woher haben wir die Schulen/hoch vnd nidrige/
Woher haben wir itzt so gelerte leute vnd vbertreffli-
che künste? Was vns die sect bracht? Ja/Woher
hat die sect selbs yre künste/welcher sie nicht gar wol
braucht? Ist nicht alles von der Kirchen geflossen/
ehe man auch von der secten zu sagen wisset? Item/
woher haben wir die Policey/Deconomey/Rechte/
zucht/manche gute gewonheit vñ löbliche ordnung?
Nicht von alters? oder hat vns solchs dise zehemieri-
ge sect allererst erfunden vnd auff bracht? Abbracht
hat sie es schir/das sehen wir leider wol / vnd darges-
gen vnzucht vnd vnordnung eingelassen / also/das
yderman darüber klagt vnd seufftzet. Ist aber noch et-
was gotsfürchtigs/guts/züchtigs vnd redlichs ynn
diser secten/das ist vor der secten gewesen/vnd nicht
ynn der secten worden. Denn zeig mir sieben menschen
vnter sieben tausenten / die vor vngotsfürchtig vnd
böś gewesen/vnd nu allererst/weil sie Luterisch sind/
gotsfürchtig vnd gut worden seyen? Zeigen wil ich
dir wol / die vor andechtig/mild/gelind / vnd eins
eingezogen lebens waren / aber nu ynn disem Euan-
gelio sind sie gar gewandelt. Der Herr gebe/das
sie sich selbs erkennen/vnd sehen / was ia-
mers sie ynn deutscher Nation ange-
richt haben/AMEN.

Bedruckt zu Leiptzig durch
Nicol. Schmidt.
M. XXXIII:

Handwritten text in a Gothic script, appearing as bleed-through from the reverse side of the page. The text is arranged in approximately 20 lines and is largely illegible due to fading and bleed-through.

Handwritten text at the bottom of the page, possibly a signature or a date. It includes the word "Gebrüder" and the Roman numeral "XXXIIII".



Anno 1629 den 27 Januarij hat mich
Dieser Herr Herr Herr geschehen der
Ernueste wohlbarheit Herr marcellus
Wijczel (Jovius) Anten dem folgenden
Regiment, und ich ihm den selben
verloren gesondt einbüch laß. B.
9. 10. Actum ut supra.

62 A. 2372

ULB Halle


3

002 166 305



56,





Apologia: das ist: ein
verteidigs rede Geor=
gij Wicelij widder
seine affterreder die Lu=
teristen/ mit sampt Kurtzer abcon=
terfeyung Luterischer secten/
vnd preis alter Römischen
Kirchen/nützlich zu
lesen.

Witzel

Auch wie er von der Kirchen ynn die secten ko=
men/vnd von den selbigen widderumb zu der
Kirchen geflohen ist.

Act. xxiiij.
Sie künden mir nicht bey bringen/
des sie mich verklagen.